

### 2.1.9. ICYICIRO CYA IX: Umuvuduko n'umwanya hagati y'ibinyabiziga

#### Ingingo ya 26 :

1. Umuyobozi wese agomba buri gihe kuyobora ikinyabiziga cye yitonze, kandi akaringaniza umuvuduko wacyo <sup>1</sup> n'uko ahantu hameze, <sup>2</sup> uko habona, <sup>3</sup> imimerere y'umuhanda, <sup>3</sup> imimerere y'ikinyabiziga n'ibyo cyikoreye, <sup>4</sup> imiterere y'ikirere, <sup>5</sup> ubwishi bw'ibigenda kugira ngo uwo muvuduko utaba intandaro y'impanuka n'imbogamizi y'uburyo bwo kugenda mu muhanda.

- Agomba gushobora guhagarika ikinyabiziga cye akurikije aho ageza amaso n'imbere y'inkomyi yose idatunguranye.
  - Agomba kugabanya umuvuduko kandi byaba ngombwa agahagarara bitewe nuko ahantu hameze <sup>1</sup> nk'igihe hatabona neza, <sup>2</sup> iyo umuhanda urimo inkomyi, <sup>3</sup> iyo ari mu makoni, <sup>4</sup> iyo amashami y'inziya nyabagendwa afunganye cyangwa akikijwe n'amazu, <sup>4</sup> hafi y'impinga z'imipando n'amasangano, <sup>5</sup> kimwe ndetse n'igihe cy'ibisikana cyangwa cyo kunyura ku gatsiko ka banyamaguru n'ibinyabiziga bihagaze cyangwa ishyo ry'inyamaswa n'igihe ari hafi yaho abantu bateraniye.
2. Birabujijwe kubangamira imigendere isanzwe y'ibindi binyabiziga kubera kugabanya umuvuduko ku buryo budasanzwe cyangwa gukacira feri bidatwe no kwirinda ibyago.
3. Birabujijwe kwoshya cyangwa gutuma umuyobozi agendana umuvuduko urenze urugero hakurikijwe ibivugwa mu gika cya mbere cy'iyi ingingo.

#### Ingingo ya 27 :

Iyo umunyamaguru yageze mu mwanya wabigenewe, aho uburyo bwo kugenda mu muhanda butagengwa n'umukozi ubifitiye ububasha cyangwa n'ibimenyetso by'umuriro, abayobozi bashobora kuhinjira bagabanyije umuvuduko kandi bakahatambuka babonye ko batateza umunyamaguru impanuka; bibaye ngombwa bagomba guhagarara kugirango umunyamaguru abanze atambuke.

#### Ingingo ya 28 :

1. Umuyobozi wese agomba kutarenza umuvuduko washyizweho n'amategeko.
2. Iyo ntamategeko awugabanya by'umwihariko, umuvuduko ntarengwa w'ibinyabiziga ushyizweho ku buryo bukurikira:
  - a) Amapikipiki n'imodoka zifite uburemere ntarengwa bw'ibiro 3500 uretse amavetiri cyangwa tagisi n'ibinyabiziga bitwarira hamwe abantu : **Ibimetro 80 mu isaha;**
  - b) Imodoka zikoreshe nk'amavetiri y'ifasi cyangwa amatagisi zifite uburemere bwemewe butarenga kg 3500 : **ibimetro 70 mu isaha;**
  - c) Imodoka zifite uburemere ntarengwa buri hagati ya kg 3500 na 12500, kimwe n'ibinyabiziga bitwarira abantu hamwe bitari byavuzwe kuri b) : **ibimetro 60 mu isaha ;**
  - d) Imodoka cyangwa ibinyabiziga bikomatanye bifite uburemere ntarengwa bwemewe cyangwa uburemere bugendana burenga ibiro 12.500 kimwe na velomoteri : **ibimetro 50 mu isaha;**
  - e) Ibinyabiziga by'ubuhinzi bifite imipira irambuka cyangwa itarambuka , imodoka zidafite ibiziceka kubera ko ariko zakozwe , izindi modoka zose zikozwe ku buryo bwihariye , zitari mu rwego rw'izimaze kuvugwa: **ibimetro 25 mu isaha ;**
3. Mu nsizi, umuvuduko ntarengwa w'ibinyabiziga ushyizweho ku buryo bukurikira:
  - a) Imodoka zigenewe gusa gutwara abantu , uretse ibinyabiziga bitwarira abantu hamwe, kimwe n'imodoka zidashobora kwikorera ibirenze toni imwe : **ibimetro 50 mu isaha ;**
  - b) Ibindi binyabiziga byose : **ibimetro 40 mu isaha;**